

Illuliornermi oqartussaassuseq pillugu Namminersornerullutik Oqartussat nalunaarutaat

Nunaminertat atorineqartarnerat pilersarusiornerlu pillugit Inatsisartut peqqussutaanni nr. 6-imi, 19. december 1986-imeersumi, Inatsisartut peqqussutaatigut nr. 1-ikkut, 18. juni 1987-imeersukku allannguuteqartinneqartumi § 21 naapertorlugu makkua aalajangersarneqarput:

§ 1. Naalakkersuisut illuliornermi oqartussaassuseqarput.

Imm. 2. Kommunalbestyrelsip Naalakkersuisunut akisussaassuseqarlutik illuliornermi oqartussaasutut suliaasat najukkami innuttaasut akornanni isumagissavaat, tassunga ilanngullugit allaffissornermi nakkutilliinermilu suliaasat.

Imm. 3. Kommunalbestyrelsip illuliornermi oqartusaaanerup aqunneqarnerani suliaasai pillugit maleruagassat "Illuliornermi Malittarisassat 2006"-imi (Illuliornermi Malittarisassat) Naalakkersuisut aalajangersassavaat, taannalu aamma Naalakkersuisunit saqqummersinneqassaaq.

Imm. 4. Qallunaatut kalaallisullu oqaasertaat assigiinngissuteqarpata, malittarisassat imaasa teknikkikkut paasiuminaannerat pissutigalugu qallunaatut allannera atuutissaaq.

§ 2. Nalunaarut atuutissaaq:

1) Nutaanik illuliornermut aamma illulianik alliliinermut.

2) Illuliornermi malittarisassani aalajangersakkanut naleqqiullugu illuliani allanngortiterinermut allatullu allannguinermit annertuumut.

3) Ikuallattoornissaq, isumannaallisaaneq peqqinnissarlu eqqarsaatigalugit illuliornermi teknikkikkut piumasaaqatinik allanik naammassinninnissamut pisariaqartitsiviusunik illuliat atorineqarnerinik allannguinermit.

Imm. 2. Illuliornermi oqartussaasup aalajangissavaa, imm. 1, nr. 2 naapertorlugu suna annertuutut isigineqassanersoq.

§ 3. Illuliat § 2-mi pineqartut kommunalbestyrelsimit sanaartornissamut akuersissuteqarfigineqartinnagit aallartinneqassanngillat. Kommunalbestyrelsip qinnuteqartoq paasissutissanik, qinnuteqaatip naliliiffiginiarnerani pisariaqartinneqartunik piumasaaqarfigisinnaavaa.

Imm. 2. Illuliat § 2-mi pineqartut kommunalbestyrelsimit akuersissuteqarfigineqartinnagit atorineqassanngillat.

§ 4. Kommunalbestyrelsip suliaasamik suliarinninnermini nalunaarut illuliornermilu malittarisassani aalajangersakkat malinneqarnerisut misissussavai.

Imm. 2. Kommunalbestyrelsip illuliornermi malittarisassat malillugit peqqussutit naammassineqarnerisut, kiisalu illuliornermi malittarisassat malillugit atugassarititaasut akuersissutini aammalu immikkut akuersissutini aalajangersarneqarsimasut malinneqarnerisut misissussavai.

§ 5. Naalakkersuisut illuliornermi malittarisassani aalajangersakkat sanioqqullugit immikkut akuersissuteqarsinnaapput. Immikkut akuerineqarnissamut qinnuteqaat Ineqarnermut, Attaveqarnermut Aatsitassanullu Naalakkersuisoqarfimmut nassiunneqassaaq.

Imm. 2. Qinnuteqaatip paasissutissat makku imarissavai,

1) aalajangersakkat suut sanioqqunnissaannut immikkut akuerineqarnissamut qinnuteqaatigineqarnersut, kiisalu

2) illuliaq qanoq ittoq suliarineqartussatut eqqarsaatigineqarnersooq.

Imm. 3. Kommunalbestyrelsi illuliassamut, illuliornermi malittarisassani portussusissatut ungasissusissatullu aalajangersakkanik sanioqqutsinissamut immikkut akuerineqarnissamik qinnuteqaateqarfiusumut tunngatillugu sanilinut attuumassuteqalersussanut tusarniaassuteqassaaq.

Imm. 4. Imm. 1 naapertorlugu immikkut akuersinissamut aalajangiinermi tunngavissat pigineqartut, tak. imm. 2 tunngavigineqassapput, tamannalu siusinnerpaamik pisinnaavoq kommunalbestyrelsip illuutit immikkut akuersissuteqarnissamik qinnuteqaatigineqartup sanilinut nalunaarutigereerneraniit sapaatit akunnerisa pingasut ingerlareernerini, nalunaarutigineqassalluni

1) immikkut akuerineqarnissamik qinnuteqartoqartoq, aamma

2) oqaaseqaataasinnaasut sapaatit akunnerisa pingasut qaangiutinnginnerini kommunalbestyrelsimut nassiunneqarsinnaasut.

§ 6. Ineqarnermut, Attaveqarnermut Aatsitassanullu Naalakkersuisoqarfiup § 5, imm. 1 naapertorlugu aalajangiinera pillugu maalaarutit, kiisalu Ineqarnermut, Attaveqarnermut Aatsitassanullu Naalakkersuisoqarfiup illuliornermi malittarisassat naapertorlugit aalajangiinera pillugu maalaarutit Naalakkersuisunut ingerlateqqinneqarsinnaapput.

§ 7. Nalunaarut 1. september 2006-imi atortuulerpoq.

Imm. 2. Tamatumunnga peqatigitillugu Kalaallit Nunaanni illuliornermi oqartussaassuseq pillugu Namminersornerullutik Oqartussat nalunaarutaat nr. 24, 9. november 1987-imeersoq atorunnaarsinneqarpoq.

Namminersornerullutik Oqartussat, ulloq 18. august 2006

Jørgen Wæver Johansen

/

Dorthe Johannsen

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut